



Bentiaraq Ottosen

UPA 2026/46-1

Atassut

12. Maj 2026

**Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allangortinneqarnera aamma pisortat oqartussaaffigisaanni suliffeqarfiinilu nioqqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaata allangortinneqarnera pillugit Inatsisartut inatsisaat (najukkani pissutsit eqqarsaatigalugit, neqerooruteqartunik ilaajunnaarsitsineq kiisalu teknikkkut siunnersuinerit aamma illuliornermi sanaartornermilu atugassanik atortussanik il.il. pilersuinerit ilanngunneri)**

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)

Naalakkersuisut saqqummiusnaanut qujavugut, pingaarnerutitatsinnilu Atassummiit saqqummiussaqaassalluta.

Atassutip ersarissartuarumavaa unammilleqatigiinerup annertusartuarnissaa, isumaqaratta suliffeqarfiit amerlanerusut sanaartortitsinermi imaluuniit sanaartornermi neqerooruteqartitsisarneq taakkunanga periarfissagissaartuarnissaa. Suliffeqarfiit amerlanerusut peqataagaangata akit pitsaannerusut aammalu pitsaasuseq qaffassissoq anguneqartuaanartoq ilisimalluarparput, taamaattumik teknikkkut siunnersuinerit aamma illuliornermi sanaartornermilu atugassanik atortussanik pilersuineri neqerooruteqartarneq pitsaannerusariaqarpoq. Atassummiit erseqqarissumik oqariartuuteqarpugut, neqeroortitsisarnermi piumasaqaatit pisariuallaannginnissaat pisariaqarmata suliffeqarfiit mikinerusut aamma peqataasinnaaniassammata. Inatsisit pisariuallaartut suliffeqarfinnut mikinerusunut akornutaasinnaasut eqqarsaatigalugit naapertuutinningsutut isigaarput suliffeqarfiit angisuut kisimik periarfissaqartarnerat, taamaattumik inatsisitigut aqqitassaasinnaasut iluarsartuuneqarnissaat pingaaruteqartutut isiginiarparput.

Atassut isumaqarpoq najukkami suliffeqarfiit pitsaannerusumik periarfissaqartinneqartariaqartut, Kalaallit Nunaanni suliffeqarfiit nunatsinneersut ineriartornissaat anguniarlugu. Atassutip oqariartuutiguarpa suliffeqarfiit namminersortut taakuupput ineriartortitsiuarartariaqartut, inatsisitigut oqimaatsunik tuniorarneqaanarsinnaangitsut. Taakuuppummi inuiaqatigiinni suliffissaqartitsisussat aamma suliffissaqartitsiuarartut, Atassutip aningaasat nunatsinniiginnarnissaat qulakkeerumallugu suliuartuuvoq, kisianni pingaartuuvoq avataaneersunik peqataatitsineq pingitsoorsinnaanginnatsigu. Nunatsinni suliffeqarfiit pisinnaasaat killeqarpata imaluuniit akit unammillerneqarsinnaangippata eqqarsaqqissaarneq pigineqartariaqarpoq, tassani soorunami nunaqavissoq salliunneqarnissaa pingaaruteqarpoq, siulianili eqqaaneqartut eqqarsaatigalugit ersarissarneqartariaqartoq oqariartuutigaarput.



Atassutip soqutigilluinnarpaa oqimaaqatigiinneq, tassani najukkami inuussutissarsiortut periarfissaqarlutik aammalu ataatsimut isigalugu unammilleqatigiineq pitsaasumik ingerlanneqarluni periarfissaajuarnissaa. Unammilleqatigiineq tassaamat pitsaasutsumik qaffassaataasoq.

Pisortat aningaasartuutaasa aqunneqarnerat erseqqarissumik sinaakkuteqartariaqarpoq aamma tamanna Atassutip politikiani pingaaruteqarpoq oqariartuutigissallugu. Sanaartornermi suliat amerlasuut pisortanit aningaasalersorneqartarput, soorlu sanaartornerit angisuut, illuliat, atuarfiit aamma meeqeriviit. Pinngitsoorneqarsinnaangitsumilli attaveqaasersuutit pisariaqavissut, soorlu mittarfiit, talittarfiit, attaveqaatit, erngup nukissiofii. Taamaattumik Atassut isumaqarpoq innuttaasut akileraarutaasa mianersortumik atorineqarnissaat pingaaruteqartuusoq, aningaasat nunatsinni kaaviaartittariaqarpagut akileraarutitigut apparsaasinnaasumik siunnerfilersilluta.

Neqerooruteqartitsisarneq pitsaanerumik ingerlanneqarpat pisortat aningaasartuutaat appasinnerusinnaapput, taamaalillunilu aningaasat allat inuiaqatigiinnut iluaqutaasumik atorineqarsinnaallutik.

Atassut isumaqarpoq ingerlatsineq pisariinnerusariaqartoq. Massakut suliffeqarfiit ilaanni misigineqarsinnaavoq qinnuteqaatit aammalu neqerooruteqarnissamat piumasaqaatit siviluallaartumik aammalu ajornarpallaartumik ingerlanneqartartut. Tamanna suliffeqarfiit mikinerusut peqataasinnaanerannut akornutaasiisarpoq. Taamaattumik Atassut isumaqarpoq neqerooruteqartitsisarnerup digitaliusumik periarfissaanissaa aammalu ingerlatsinerup sukkanerulersinneqarnissaa pingaaruteqartoq.

Siunnersuummi aamma pineqarpoq suliffeqarfiit isumaqatigiissutinik malinninngitsut imaluunniit pitsaasumik ingerlatsinngitsut neqerooruteqartunit peerneqarsinnaanissaat. Tamanna Atassutip tapersorsorinnaavaa, tassami inuiaqatigiinnut pingaaruteqarpoq suliffeqarfiit pisortat suliassaannik isumaginnittut tatiginartuussasut aammalu pitsaasumik naammassinnittassasut. Sanaartornermi kinguaattoornerit, missingersuutit qaangerlugit aningaasartuuteqarnerit imaluunniit pitsaasutsip appasinnera inuiaqatigiinnut akisuumik kinguneqarsinnaamat. Taamaattumik aserfallatsaaliinermi kinguaatoorutit matussuserneqassappata aserfallatsaaliinermit inatsit pitsanngorsartariaqarparput.

Kiisalu Atassut isumaqarpoq Kalaallit Nunaanni immikkut pissutsit inatsisini eqqarsaatigineqartariaqartut. Nunarsuarmi nunat allat assigalugit inatsisit atorineqarsinnaanngillat, tassami Kalaallit Nunaanni nunap annertussusia, silaannaap pissusaa, attaveqaasersuutit aammalu innuttaasut siaruarsimanerat immikkut ittumik unammillernartuupput. Taamaattumik neqerooruteqartitsisarnermi inatsisini pisariaqartinneqarpoq eqaassuseq aammalu najukkani pissutsinut naleqqussarneq.



Tamanna pingaaruteqarluinnarpoq Kalaallit Nunaanni maanna aningaasarsiornikkut inissisimaneq eqqarsaatigalugu, tassani akit qaffakkiartuinnarnerat aammalu sanaartornermi aningaasartuutit inuiaqatigiinnut innuttaasunullu annertuunik artukkiisumik sunniuteqarmata.

Taama oqaaseqarluta Naalakkersuisut siunnersuutaat taperserparput, aappassaaneerneqartigani Sanaartornermut Ataatsimiititaliamut innersuullugu inassutigaarput.